

05/02/1999

Malaysia terus ulangi sokongan

KUALA LUMPUR, Khamis - Malaysia sekali lagi menyatakan kesungguhan untuk melihat Kemboja diterima sebagai anggota ke-10 Asean dalam tempoh yang singkat.

Perkara itu dinyatakan Perdana Menteri, Datuk Seri Dr Mahathir Mohamad dalam perbincangan dua hala dengan Perdana Menteri Kemboja, Hun Sen, di Jabatan Perdana Menteri, petang ini.

Menteri Luar, Datuk Seri Syed Hamid Albar, berkata dalam pertemuan itu, Dr Mahathir menyatakan hasrat supaya Kemboja merealisasikan pembentukan Dewan Senatnya bagi memenuhi syarat kemasukan negara itu dalam Asean.

Mengikut ketetapan pada sidang kemuncak Asean ke-6 di Hanoi Disember lalu, anggota Asean setuju menerima Kemboja dengan syarat tertentu termasuk berhubung pembentukan Dewan Senat di negara ini.

Selain perbincangan dua hala, Dr Mahathir dan Hun Sen menyaksikan majlis menandatangani perjanjian perdagangan yang masing-masing diwakili Menteri Perdagangan Antarabangsa dan Industri, Datin Seri Rafidah Aziz dan Menteri Perdagangan Kemboja, Cham Prasidh.

Perdagangan dua hala antara Malaysia dan Kemboja pada 1997 bernilai RM326.8 juta sementara bagi tempoh Januari hingga November tahun lalu (RM175.4 juta).

Perkara lain dibincang ialah penyediaan latihan kepada Kemboja dalam bidang seperti sektor petroleum dan gas, pertanian serta dasar luar.

Ketibaan Hun Sen dan anggota delegasi hari ini, termasuk Menteri Luar, Hor Namhong dan Menteri Kewangan, Keat Chhon di Lapangan Terbang Antarabangsa Kuala Lumpur (KLIA) disambut Syed Hamid.

(END)